



*Parabole des seruiteurs & du fils d'un pere de famille, que l'on tue allans querir les fruiçts de la vigne.*

**N**E S/V S qui connoissoit les plus secrettes pensées des Pharisiens, & Prestres de la Loy, & qu'ils machinoient sa mort, leur proposa plusieurs paraboles; entre lesquelles il leur dist, Vn pere de famille planta vne vigne, qu'il entourna d'une haye, l'accommodant d'une tour & d'un pressoir, la loua aux vigneronns, puis s'en alla en lointaine region, où il fut long-temps, & au retour enuoya ses seruiteurs aux vigneronns pour receuoir les fruits. Mais les vigneronns se ietterent sur eux & en tuerent l'un, lapiderent vn autre; & l'autre estant navré, s'enfuit vers le pere de famille, qui y enuoya d'autres seruiteurs en plus grand nombre, qui furent traittez comme les premiers: parquoy ce pere de famille y enuoya son fils; mais les vigneronns le voyans venir, conclurent entr'eux de le mettre à mort; ce qu'ils firent, puis le ietterent hors la vigne. Quand donc (dit Iesus) le Seigneur de la vigne viendra, que fera-t'il à ces vigneronns-là? Et ils luy dirent, Il les fera perir malheureusement, & louera sa vigne à d'autres, pour en auoir les fruits en temps & saison. Or les Scribes entendans qu'il parloit à eux, le voulurent faire prendre; mais ils craignirent le peuple, qui reputoit Iesus comme vn Prophete.